

Uunga siunnersuut: Utoqqalinersiaqarneq pillugu Inatsisartut inatsisaata aamma Siusinaartumik pensionisiat pillugit Inatsisartut inatsisaata allanngortinneqarnerat pillugu Inatsisartut inatsisaat

(Isumaginninnermut Sulisoqarnermullu Naalakkersuisoq)

Akissutitut allakkiaq

(Isumaginninnermut Sulisoqarnermullu Naalakkersuisoq)

Aappassaaneerera

Utoqqalinersiaqarneq pillugu Inatsisartut inatsisaata aamma Siusinaartumik pensionisiat pillugit Inatsisartut inatsisaata allanngortinneqarnerat pillugu Inatsisartut inatsisaannut siunnersuummut atatillugu Ilaqutariinnermut Peqqissutsimullu Ataatsimiititaliap sukumiisumik suliaqarneranut, aammalu siunnersuummik akuersaarluarneq pillugit Naalakkersuisut qutsaviginnipput.

Siunnersuummik taamatut saqqummiunneqartumik ataatsimiititaliap akerliusoqarani akuersaarnera Naalakkersuisut nuannaarutigaa.

Inatsisip nutaap qanoq paasineqassanerani, ingammillu nungullarsimanerup nassatarisaanik siusinaartumik pensionisiaqalernissaq pillugu qinnuteqartoqarneq pillugu, aammalu ukiut taakku 35-t pillugit malittarisassiaq pillugu, ingammik suliamik isumaginninnerup nukittorsarnissaanut tunngatillugu, peqqissaarussamik ilitsersuummik suliaqartoqarnissamik ataatsimiititaliap kaammattuutigisaa Naalakkersuisut maluginiarpaat.

Siusinaartumik pensionisiaqarneq aamma piginnaangorsaaqqinneq pillugit qinnuteqaatinut tunngatillugu sulianik isumaginninnerit akulerunneqassannginnerisa, imaluunniit pisariaqanngitsumik sivisuallaamik isumagineqassannginnerisa qularnaarnissaannik suliamik nangitseqqinnissamik ataatsimiititaliap kaammattuutigisaa Naalakkersuisut ilanngunniarpaat.

Taamatut oqaaseqarnermikkut Naalakkersuisut siunnersuut aappassaanneernissaanut ingerlateqqippaat.